

## Sepinien xa diamu te Temis

### *?Visi iaxa tetis uvei ak?*

Moletin xa tetis uvei ak, hisen Temis. Xi tehiteni xa tehe moletin te polien na Iesu Kristo xa tehe Suv nan. ✧ Tuneli xati tehe Iesu xal Siud (xa hisen teimun tehe Sudas), ✧ e xi tehe vat te sias te hal Serusalem. ✧ Tave ti neta xa Siud xal Temis lube tua xati na Iesu, lutnake reitin ti xa Iesu tehe Mesaea e melele xa xi temeul tamu teta. ✧ E Iesu testal mi Temis tetutou ni mea rilomunen nan. ✧ Di, Temis xal Siud mei luteneket en sung. ✧ Di, xalu lutepol tetel Kristin xil e mei lutehe elda nae. ✧ Temis temat e haram hanutap tol e lu mun AD (haram 62 tetutou ni poten na Iesu) e he vat xil na Siu xil e hal Serusalem xa latehov vini.

### *?Visi iaxa tevuli uvei ak tetiamu?*

Temis tetis uvei ak teha mi Siu xil xa latehe Kristin xil xa latetasil ba lateti e rute xil vus e ut etan. ✧ Xi tetis uvei ak sangas ni haram hanutap lu e tol e he sav mun (48) AD tetiamu ni vitueien xa eilep tetel Pol xal Saelas usil Kristin xil xa latave ngan Siu ti e haram hanutap lu e he xalu mun (50) AD.

### *?Veneh vari Temis tetis uvei ak?*

Temis tesel xat Kristin xil tangan lipisen reitinen te neketen nae ixo sexien hos xil - Kristin xil xa latehe Siu xa latetasil ba lateti e tan na ngan xil xa latave Siu ti di latenemi latehit pipin tang tangan lineket e Hi e Iesu Kristo ixo nenemien nae kestang. E Temis tesel xat xil

---

✧ :: Tem 1:1    ✧ :: Mat 13:55; Mak 6:3    ✧ :: Pol 12:17; 15:13,19; Kal 2:9,12    ✧ :: Sion 7:3-10    ✧ :: 1Kor 15:7    ✧ :: Pol 1:14    ✧ :: 1Kor 9:5; Kal 1:19    ✧ :: Tem 1:1

tengan ti lipol ni naha xa sepinien na Hi di biteni.✧ Temis tehiteni mun xa hisit neketen xa sexien hos xil teni tovuol mat tang.✧

Temis tesel xat Kristin xil tangan lisoh ixeih e melele xa lihisu e sakpisien xil e melele te xeih xil - Kristin xil di latehisu ni hisit melele te xeih sav xil. Ma tesel xat xil tangan lisokil e neketen nae vengan xa ti lihur meulien sal.✧ E ien tehei tangan likila xa sakpisien xil xa di bemei e xil taxo Hi ti, e texo nenemien tesa nae xil tang.✧

Temis tesel xat Kristin xil tangan sepinien e sexien nae xil ihusil metisouen xa nggo ut nesao - Temis telongeong ni xa Kristin xil di lale ras suse te reitinen na Hi,✧ di lalonge misa e lamesei,✧ di langor e lasep koai,✧ e di lapol ni sexien tesa xil vengan xa eheien nae di e holesok xil na mosav xil.✧ Ve rin ak, Temis tesel xat xil tangan lisis mi Hi tangan isa metisouen nan mi xil.✧ Metisouen ak ipispisi mi xil ni sexien xa liti ihos itel mosav xil e itep iaxa linamaen sexien nae tetiamu ti nalihi nenemien nae mun.✧

Temis tesel xat Kristin xil tangan lixuxou kuhi e linamaen nenemien te mani ti nalihi nenemien nae - Temis telongeong ni xa ngan xil te sias di latemerere ni ngan xil xa holesok nae holu e di latenem male ni movotei xil tang.✧ E ngan xil xa holesok nae tehe holu latepurun ngan xil xa holesok nae tehe tovuol.✧ Temis tesel xat Kristin xil ak tangan liling eheien nae e Hi itel sepinien nan, e linaling eheien nae ti nati e holesok xil te ut etan.✧

*Nenemien xa eilep te uvei ak de Temis 2:18*

---

✧ :: Tem 1:22,25   ✧ :: Tem 2:17   ✧ :: Tem 1:12   ✧ :: Tem 1:12-18  
 ✧ :: Tem 5:19   ✧ :: Tem 5:13-14   ✧ :: Tem 3:14   ✧ :: Tem 4:1-4  
 ✧ :: Tem 1:5   ✧ :: Tem 3:17-18   ✧ :: Tem 2:1-4   ✧ :: Tem 2:5-7;  
 5:1-6   ✧ :: Tem 4:4

E vahit moletin tei vahiteni minou vahit, “Rut moletin xil langgur neketen kestang, e rut moletin xil langgur neketen del sexien hos xil teni mun.” E nenemien na moletin ak tamal ti. Moletin ti misakras vapisen reitinen te neketen nan xosxa sexien hos xil teni tovuol. E inou nikila nipisen reitinen te neketen navan ixo sexien hos xil teni.

*?Naha iaxa di e uvei ak?*

1. Selxatien tangan Kristin xil lisoh ixeh e neketen nae e melele xa labisu ni sakpurunien xil. (1:1-18)
2. Sexien hos na ngan xil xa neketen nae be reitin. (1:19-5:20)
  - a. Ngan xa neketen nan be reitin di milong xat sepinien na Hi. (1:19-27)
  - b. Ngan xa neketen nan be reitin naketeh ni ti navit moletin tei mili moletin sav xil. (2:1-13)
  - c. Ngan xa neketen nan be reitin ipisen kil xi ixo sexien hos xil nan. (2:14-26)
  - d. Ngan xa neketen nan be reitin di ngguxou kuhi ve sepinien nan xil. (3:1-12)
  - e. Ngan xa neketen nan be reitin di nggusil metisouen na Hi. (3:13-18)
  - f. Ngan xa neketen nan be reitin di miling nenemien nan be tan pe met Hi. (4:1-12)
  - g. Ngan xa neketen nan be reitin di miling nenesien nan e Hi e tave holesok xil ti te ut etan. (4:13-5:6)
  - h. Ngan xa neketen nan be reitin di datil mei rilomunen na Iesu Kristo del nenemien xa teviei. (5:7-12)
  - i. Ngan xa neketen nan be reitin be moletin te sisen. (5:13-18)
  - j. Ngan xa neketen nan be reitin di misak pisi tangan vahiles mosav xil ra suse te maten xa ladi en. (5:19-20)

*Sepkilaen na Temis usil uvei ak*

<sup>1</sup> Inou, Temis, nabe moletin te polien na Hi e na Suv Iesu Kristo. ☆

Nabit ‘bos makoe’ mi xamim xa mustal munggo vatimol xa mahulong lu e le tei (12) te hal Isrel, xa sakpurunien xil tesak ni xamim muletasil ba mudi e rute xil vus nggoni ngan halesav xil.\*

*Neketen e metisouen xa nggo Hi itutou ni ngan xil xa di labisu ni melele xil te xeih*

<sup>2</sup> Tuxoli e hinoxoli xil, melele xa di mubisu ni melele xil te xeih nggo suse sav xil munalonge ti nasa ven, e muhesi xamim tang. ☆ <sup>3</sup> Vengan xa mukila xa holesok xil xa di misak pis neketen namim ti isak ni xamim mei mukila musokil mak mu. ☆ <sup>4</sup> E melele xa musokil e neketen xil namim vehakut, isak ni mumatu kuhi e neketen namim e sexien namim imal tevi. Imak, ma munave tamure ni ti neta melele xa ti muhisu ni holesok xil vus xa ti imei.

<sup>5</sup> E xosxa tei e xamim be tamure ni metisouen e meulien nan, ma isis Hi ni e xi isa ni mini. Isa ni mini vengan xa, vehakut, Hi besi xi tangan vasa holesok xil xa bos mi moletin xil. ☆ <sup>6</sup> E melele xa xamim di musis Hi ve neta ngan, muneket ixeih xa Hi di milong sisen namim e isa huite teni. Nenemien namim usili nave lu ti, vengan moletin xa taneket kuhi ti e Hi, xi tara kat ti e di pol lualu ni holesok xil nggoni tahe tei xa mea e mesal e votiang dit divinlil ni. ☆ <sup>7</sup> Hisit moletin xa mak nanem ti nahit Hi isak ni huit sisen nan mei istal, <sup>8</sup> vengan xa Hi mikila xa nenemien nan usil sisen nan be lu e xi tara kat ti e rin xil holu e meulien nan.

---

☆ 1:1: Pol 15:23; 1Pit 1:1 \* 1:1: Latekes Kristin xil ni ‘halesav xil’ vengan xa vonexil xati be ut nesao. Latehit usili e Pol 8:1,4; 11:19. ☆ 1:2: Rom 5:3-5; 1Pit 1:6 ☆ 1:3: 1Pit 1:7 ☆ 1:5: Pro 2:3-6 ☆ 1:6: Mat 7:7; Mak 11:24

*Momal xa moletin xil vus lavesi xil ve naha xa Hi tepol ni ve rin nae*

<sup>9</sup> Xamim xa holesok namim e ut etan tovuol, mukila musep koai vengan xa mutehur his xa be nesao pe met Hi. <sup>10</sup> E xamim xa holesok namim holu, neta sav xa, vatei, holesok namim xil ikesae ixoni hosien te hungovae tei, mukila musep koai vengan xa mutehur hisit his xa pipin mi moletin sav xil pe met Hi. ☆ <sup>11</sup> Reitin, hungovae tei, melele xa eai be nesao e minggan nggeih, misin xat hungovae ak e misak ni hosien teni di mikesae, mei melles, e mot be tan. Nggusil hisit sexien ak, e melele taxa moletin tei xa holesok nan holu di tamu pol ni polien nan xil, xi ikesae itel holesok nan xil.

*Hi tave vatite te melele te xeih xil mu sakpisien xil ti*

<sup>12</sup> Tuxolxatien na Hi iti mi ngan xil xa di lasokil e melele xa di labisu ni melele te xeih xil e sakpisien xil. Lihesi xil vengan xa ngan xil xa di lasokil e neketen nae mak lihur huit neketen nae xa ihe meulien sal xa Hi Suv tehit xati mi ngan xil xa eheien nae di en. ☆ <sup>13</sup> E melele xa di ranggur sakpisien tengen rapol ni neta xa vasa, rinanemi ti rinahit Hi iaxa di misak pis xir. Sakpisien ak misakras vaxo Hi vengan xa xi misakras vasak pis moletin tei vaxo rin te tesaen. Ngan ak be reitin vengan xa tesaen misakras vasak pis Hi vari. <sup>14</sup> E sakpisien xil nggo tine moletin tang, e melele xa eheien nan de neta tei xa misa, e maen ni milih ni nenemien nan. <sup>15</sup> Di, eheien e neta xa misa xiak di meul xusus e nenemien nan nggoni ngan xa tuvava tei di meul xusus e vang ninen. Reitin, eheien tesa ak di meul xusus ba vuma ... mei mistal e valkesao be sexien te tesaen. E melele xa tesaen ak mei imeul ihe eilep e meulien na moletin ak xa temaen ni tengen vameul, tesaen ak ihiles

---

☆ 1:10: Sam 102:4,11; Aes 40:6-7; 1Pit 1:24 ☆ 1:12: 1Kor 9:25; 2Tim 4:8; 1Pit 5:4; Rev 2:10

ihas vini vari. <sup>16</sup> O navan xil li, vengan xa rin ak be reitin, munahusil pispisien te luvosen xil ti usil Hi.

<sup>17</sup> E bos xa mukila xa sanien xil vus xa bos e momal tevi di lastal langgo he Hi Tamer xa de ut nesao xa besi xi tangan ti vasa xil. Xi iaxa be vatit miehen xa tepol ni eai, aveti, e hitu xil. E sexien nan xil taviles ti vaxoni nini neta tei xa mieh e, di, bilhiles mei maluxoluk. ✧  
<sup>18</sup> Nggusil nenemien nan, Hi tesak ni xir mei rabe neta hu texo sepinien te reitinen nan. Xi tepol ni temak vengan ien bei tangan vasak ni xir mei rave eilep raleli holesok sav xil vus xa xi tepeas ni, nggoni ngan xa rabe muimol teni. ✧

*Melele xa di rateong ni sepinien na Hi, momal mun tangan ripol ihusili*

<sup>19</sup> Tuxoli e hinoxoli xil, bos mak mu tangan xamim vus mutemanon tangan muteong kuhi ni sepinien na mosav xil, e munatemanon ti tangan munaso sepinien tova. Ma munave hisit moletin xil ti xa iexil di mikat manon. ✧  
<sup>20</sup> Vengan melele xa iemim di mikat, musakras mupol ni ti neta xa vama pe met Hi. <sup>21</sup> Misak ni, muso sen sexien tesa xil liha vengan xa lapuru pupu e di labo e meulien namim. E itel nenemien xa ihe tan, muhur pilei sepinien xa Hi telih xati tete meulien namim e mupol ihusili. Reitin, muhur pilei vengan xa xeihen di en tangan vateh meulien e xamim. ✧

<sup>22</sup> Melele xa di mulong sepinien na Hi, bos xa ti mupol ihusili. Vengan xa ngan xil xa latahusili ti, xil di luvos xil mun tang. ✧ <sup>23</sup> Reitin, xosxa moletin tei di milong sepinien na Hi e di tapol ti vahusili, ma xi nggoni moletin xa ba pus valnaon e kilas tei. <sup>24</sup> E melele xa be reling kilas

---

✧ 1:17: Mat 7:11    ✧ 1:18: Sion 1:13; 1Pit 1:23    ✧ 1:19: Ekl 7:9

✧ 1:21: Kol 3:8; 1Pit 2:1    ✧ 1:22: Mat 7:26; Rom 2:13

ak, ien bovorong ni valnaon mun vari. <sup>25</sup> E xamim mube ngan xil xa di mupus rae na Hi xa momal tevi xa ikila isak ni xamim mumeluv ra ekaten te lepisien na Hi xa iha xat tesaen. Ma, munem xati e muhusil xat kuh naha xa di biteni. Imak, ma tuxolxatien na Hi iti e meulien namim.  
☆

<sup>26</sup> Xosxa mubit mube moletin xil xa di munggulil kuh sexien xil te neketen pe met Hi, e mutaxuxou kuh ti ve sepinien namim xil, ma di muluvos xamim mun tang e neketen namim tave reitin ti. ☆ <sup>27</sup> Hisit sexien xil te neketen xa bos mak mu e memese tevi pe met Hi Tamer mak: ti mulaxat kuh timaru xil e tunau xil xa lakameti nggeih e meulien nae, e ti munamaen meulien namim ti mei nahe muis ni tesaen xil te ut etan.

## 2

*Selxatien tengan Kristin xil linapet rat moletin tei ti nali moletin sav*

<sup>1</sup> Tuxoli e hinoxoli xil, xosxa neketen namim di e Suv Iesu Kristo xa hisen eilep mak mu mili sen his sav xil, munapet rat hisit moletin tei ti nali hisit moletin sav xil. <sup>2</sup> Ma, vahit moletin lu lalomei e vitueien tei namim, tei xa holesok nan holu xa mising bos e pilas ni xi ni ring xa be gol, e tei xa holesok nan tovuol xa mising ni talmusu xil tang. ☆ <sup>3</sup> E vahit mupus kil ngan xa mising bos muhit, “Amei li, utotan e vontoen xa bos xiak.” E ti, ha muviteni mi ngan xa mising ni talmusu muvit, “!Ha, usoh inggaxor!” mu “!Amei, utotan e tan inggak!” <sup>4</sup> Xosxa di mupol ni hisit sexien ak ma nenemien namim polu ni tesaen. Nenemien namim misa vengam xa di pisen ni xa di mulepis rin na moletin xil mubit rut moletin xil labos lali rute ngan xil.

---

☆ 1:25: Rom 8:2; Kal 6:2; Tem 2:12; 1Pit 2:16; Sion 13:17

☆ 1:26: Sam

34:13; 39:1; 141:3 ☆ 2:2: Siob 34:19; Pol 10:34; Tem 2:9

<sup>5</sup> !Tuxoli e hinoxoli xil, muteong kuhi! ?Midep? ? Mutakil ti xa Hi tehosei ngan xil xa holesok nae xil tovuol e ut etan tangan mei lipolu kuhi ni neketen? E tehit xati xa mei lihe vat xil te holesok xil xa ladi pe lelatatien nan. ☆ <sup>6</sup> ?Ma veneh ma di munem male ni ngan xil xa holesok nae tovuol? Vengan be ngan xil xa holesok nae xil holu iaxa di lasak purun xamim. Xil iaxa di lalihi xamim mube von koten. <sup>7</sup> Be xil iaxa di lasopin misa ba xat his hos na Iesu, ngan xa mutehuri mei be Suv namim.

<sup>8</sup> Bos mak mu xa muhusil xat rae na ngan xa be suv toto nar reitin xa tehiteni e Vanuvei Eo tehit, “*Temim ihei moletin sav xil ixoni ngan taxa xamim vus di iemim bei xamim mun tang.*”

(Lev 19:18) <sup>9</sup> E xosxa ti mupet rat hisit moletin tei ili hisit moletin sav xil, ma ngan ak be tesaen ba xat rin namim, e rae na Hi di pisen kila xa di munggur xoteh rae nan. ☆ <sup>10</sup> Vengan, neta sav xa sangas muvur xat rae xil vus na Hi, e munggur xoteh tei takes, ma pe meten, nggoni ngan xa munggur xoteh rae nan xil vus. ☆ <sup>11</sup> Nggusil nenemien ak, Hi tesemae ni tehit, “*Munakan ni ti atou mu tiramue na mosav.*” (Eks 20:14) ☆ E tesemae ni mun tehit, “*Munahas vin ti moletin.*” (Eks 20:13) ☆ E xosxa mutakan ni ti atou mu tiramue na mosav, e muba sung mubas vin moletin tei, ma di tamu munggur xoteh rae na Hi.

<sup>12</sup> Ma, vengan xa mukila xa rae na Hi ikila isak ni xamim mumese ra ekaten te lepisien nan ba xat tesaen, sepinien e sexien namim mi mosav xil ihusil rae nan te eheien. ☆

<sup>13</sup> Vengan moletin xa tapisen eheien ti mi mosav xil, xi nakamet ti eheien e Melengien te Lepisien. E ngan xa di

---

☆ 2:5: 1Kor 1:26-28    ☆ 2:9: Dut 1:17    ☆ 2:10: Mat 5:19    ☆ 2:11: Dut 5:18; Mat 5:27; 19:18; Mak 10:19; Luk 18:20; Rom 13:9    ☆ 2:11: Dut 5:17; Mat 5:21; Mak 10:19; Luk 18:20; Rom 13:9    ☆ 2:12: Rom 8:2; Kal 6:2; Tem 1:25; 1Pit 2:16



pisen eheien mi mosav xil, xi ikamet eheien na Hi melele xa isoh pe meten e melele nen ak. ☆

*Ngan xil xa neketen nae be reitin lipisen ni ixo sexien hos nae xil*

<sup>14</sup> ?Tuxoli e hinoxoli xil, naha ihos mi moletin tei xa bit neketen nan da, e sexien hos nan xil tovuol? ?Midep, hisit neketen ak mikila vateh meulien e moletin ak? !E-e, misakras! ☆ <sup>15</sup> Xos tuxoli mu hinoxoli tei namim da xa eising nan tovuol e anien an tapin ti. <sup>16</sup> E xosxa mubiteni tang mini mubit, “Uha itel tomat. Ulonge vem itin e ti uanien kuhi,” e mutatutou ni ti, ma neketen namim be neta sav tang. <sup>17</sup> Ma mupusi xa neketen xa sexien hos xil tahuili ti be neta sav tang. Reitin, hisit neketen ak mat. ☆

<sup>18</sup> E vahit moletin tei vahiteni minou vahit, “Rut moletin xil langgur neketen kestang, e rut moletin xil langgur neketen del sexien hos xil teni mun.” E nenemien na moletin ak tamal ti. Moletin ti misakras vapisen reitinen te neketen nan xosxa sexien hos xil teni tovuol. E inou nikila nipisen reitinen te neketen navan ixo sexien hos xil teni. <sup>19</sup> ?Be reitin xa di oke reitin xa Hi be tei takes? Ngan ak bos, e munem kila xa ninin tesa xil mun lake reitin e rin ak, e lexil di mulul del ulikanen ve pangasien xil xa di bemei e xil. ☆ <sup>20</sup> Di opisen ni xa vatum tovuol. Nipisen kila minuk xa neketen xa sexien hos xil tovuol en be neta sav tang.

<sup>21</sup> Xamim munem usil Ebrahim, vatit avu nar tetiamu. Xi mei temat pe met Hi texo sexien hos nan xil. Vengan melele xa Hi tesis, Ebrahim teling natneli Aesak e hor tangan vahas vini vahe sanien eo nan mini. ☆ <sup>22</sup> Mak, ma mupus kila xa neketen na Ebrahim di pol vituei del sexien

---

☆ 2:13: Mat 5:7; 18:32-35 ☆ 2:14: Mat 7:21 ☆ 2:17: Tem 2:20,26

☆ 2:19: Dut 6:4; Mat 8:29; Mak 1:24; 5:7; Luk 4:34 ☆ 2:21: Sen 22:9,12

hos nan xil. Reitin, texo sexien hos nan xil, Ebrahim tepisen ni xa neketen nan temal tevi. ☆ <sup>23</sup> Ngan ak tepisen reitinen te sepinien xa de Vanuvei Eo na Hi xa bit, “*Ebrahim miling neketen nan e hitxatien na Hi. E ve rin ak, Hi bit rati xa Ebrahim momal pe meten.*” (Sen 15:6)☆ E ve rin ak, lakes Ebrahim ni timue hos na Hi. <sup>24</sup> Ma mupus kila sung xa moletin mei momal pe met Hi nggo sexien hos nan xil mun, e taxo neketen nan ti kestang.

<sup>25</sup> Nggusil hisit sexien ak, Rehab xa tehe atou tei te suse mei temal pe met Hi tehusil sexien hos xil xa tepol ni. Vengan xi tepol ni temal melele xa tehur pilei moletin te luvoloven lu, e tesil xalu lutelesae lutexo suse sav luteha. ☆

<sup>26</sup> Mukila xa xosxa nini moletin tei be relingi, ma tenbe moletin ak mat. Nggusil hisit nenemien ak, xosxa sexien hos xil na moletin tei tovuol, ma neketen na moletin ak mun mat.☆

### 3

#### *Muxuxou kuhi ve sepinien namim xil*

<sup>1</sup> Tuxoli e hinoxoli xil, nave xir vus ti mei rinave moletin te pispisien xil e sias. Vengan Hi ilepis moletin te pispisien xil ixeih mu ili mosav xil. <sup>2</sup> Be reitin xa xir vus di rapol ni sexien holu xa tamal pupu ti. Vahit opus moletin tei xa sepinien xil vus xa di mistal nggo vulongen momal tevi vehakut, ma moletin ak matu kuhi e sexien nan momal tevi. Imak, ma xi mikila ixuxou kuhi ve sexien xil vus te tenben. <sup>3</sup> Munem usil ngan xil xa di laloh e hos xil. Melele xa di laling tutut aean tei de vulonge hos, lakila laviles tenbe hos tangan vasak ni vahusil nenemien nae e valong xat xil. <sup>4</sup> E munem mun usil sexien na ngan xil xa

☆ 2:22: Hib 11:17 ☆ 2:23: Rom 4:3,9,22; Kal 3:6; 2Kron 20:7; Aes 41:8

☆ 2:25: Sos 2:4,15; 6:17; Hib 11:31 ☆ 2:26: Tem 2:17,20

di laloh e tuturil tei. Neta sav xa tuturil ak eilep e di miloh nggo votiang tei xa nggeih, e vatihos te tuturil ak mikila vahilesi vatel stia tei xa hokorong tang tangan vasak ni vahusil nenemien nan. <sup>5</sup> Nggusil sexien ak, vulongexir hokorong tang, e mikila vasep koai usil holesok xil xa tellep.

Munem usil sexien te upang. Tave ti neta xa hatupang tei hokorong tang, e mikila vaa len urmatu tei xa mahulong. <sup>6</sup> Vulongexir nggoni upang. Be rut tenbexir tei tang, e di pol pupu ni tesaen xil vus te ut etan, e mikila vasak ni tenbexir vus mei vahe muis pe met Hi. Reitin, vulongexir di milihni upang te Vangavul xa misakras vamat bemei di ngga len holesok xil vus e meulien nar. ☆

<sup>7</sup> Munem usili xa vongoro xil, tuman xil, moup xil, e holesok xil vus xa lameul ladi e tas labe holu pupu. E xil vus, moletin xil te ut etan iaxa lakila lasak ni xil mei lamah e dit lapol vehakut ni. <sup>8</sup> E, e rin te vulonge moletin, moletin tovuol mikila vasak ni mei vama. Reitin, vulongexir dit purun mosav xil del holesok xil xa misa nggoni vulonge tetal tesa tei xa di mingas vin moletin xil. ☆

<sup>9</sup> Del vulongexir, di rasa memesien ba mi Hi Suv xa be Tamer. E del vulongexir mun tang di rasuhol moletin xil xa langgur nini Hi. ☆ <sup>10</sup> Ma di rapus sexien ak e meulien nar xa nggot vulonge moletin tei, memesien e susuholen xalu vus di lustal lunggo en. !Tuxoli e hinoxoli xil, tamal ti tangan rapol ni vama! <sup>11</sup> ?Munemi mubit tas del oei xa mexal lalikila lalileh lalixo vangoei tei takes? <sup>12</sup> ?Mu munemi xa vatit tavu mikila vava ni huit vetei, mu vatit mal mikila vava ni huit tavu? !E-e, misakras! E oei xa bos te munien misakras vastal vaxo metatum te tas. Ve rin ak,

---

☆ 3:6: Mat 12:36-37; 15:11,18,19    ☆ 3:8: Sam 140:3; Rom 3:13    ☆ 3:9: Sen 1:26,27; 1Kor 11:7

tuxoli e hinoxoli xil, sepinien xa istal ixo vulongexir ihos kestang.

*Bos xa meulien nar ihusil metisouen xa nggo Hi*

<sup>13</sup> ?Visi e xamim minemi bit xi polu ni metisouen e mikil neta? Xosxa imak, ma ipisen ni ixo meulien nan itel sexien hos xil xa di pol ni del nenemien xa be tan e del merouen xa di nggusil metisouen. <sup>14</sup> E xosxa munem misa pupu ni moletin sav xil vengan xa holesok nae xil labos mak mu lali holesok namim xil, e xosxa iemim bei tangan muhe nesao mak mu muli xil, ma munasep koai ti e munaluvos xamim ti munahit munggur metisouen nggo Hi ngamu. <sup>15</sup> Vengan nenemien tesa xil ak tastal ti vaxo Hi e ut nesao. Hisit nenemien ak nggot ut etan nggusil nenemien na moletin xil tang, e di mistal nggo Temat vari. ☆ <sup>16</sup> Ngan ak be reitin vengan melele xa rapus sexien xa moletin tei di minem misa ni moletin sav xil vengan xa holesok nae xil bos mak mu mili holesok nan, e ien bei tangan ihe nesao mak mu ili mosav xil, rikila ripus ngongoren xil holu e hisit sexien tesa sav xil mun xa lapuru tang. <sup>17</sup> E sexien na moletin xa nggur hisit metisouen xa nggo Hi te ut nesao isav. Itiamu, sexien nan imese tevi, e tomat e merouen iti en. Ien isae e mosav xil e ti ipol ihos mi xil. Vehakut ti iteong kuhi ni nenemien na mosav xil, e ti ipus moletin xil vus lipin tang. Xi misakras vapol ni neta vahusil nenemien te luvosen. <sup>18</sup> E melele xa moletin te tomat di milih utiei xil te sexien hos xil, xi ileh viton huite teni e meulien nan xa ihe momalen. ☆

4

*Kristin xil linamos ti natel ngan xil xa di lapol ni sexien xil te ut etan*

---

☆ 3:15: Tem 1:5,17    ☆ 3:18: Aes 32:17; Hib 12:11; Mat 5:9

<sup>1</sup> Natelongeong ni xa xamim di mubae e di mungor mi xamim mun tang. ?Sexien ak nggo xave? Sexien te ngongoren ak di nggo holesok xil xa misa xa di iemim bei xa di bae del neketen namim e tinemim. ✧ <sup>2</sup> Iemim bei pupu ni holesok xil na mosav xil xa namim tovuol, ma mupol ni suse tangan muvas vin xil ven. Reitin, muling nenemien namim e neta ngan, e mupusi xa musakras muvuri. Ma, di mubae e di mungor ven. E mutahur ti neta vengan xa mutasis Hi ti ven. <sup>3</sup> E melele xa di musisi ve neta, mutahuri ti. E mutahuri ti vengan xa iemim bei muvuri tangan vasak ni xamim kestang mulonge vahos ni.

<sup>4</sup> Sexien namim nggoni atou tei xa miling tiramue nan xati e ba da vituei del tiramue sav. Vengan melele xa di iemim bei holesok xil te ut etan, di mupisen ni xa mube reling Hi. Misak ni, ngan xil xa iexil bei tangan laling eheien nae e holesok xil te ut etan, xil mei labe elu mi Hi tang. ✧ <sup>5</sup> Vanuvei Eo na Hi di biteni xa Hi tepeas ni nini moletin xil e teling xil lateti e moletin xil. ?E midep, munemi mubit sepinien na Hi dit misepin votei tang melele xa Hi ien bei pupu ni tangan ninin nar mei ihe reitin mini? ✧ <sup>6</sup> E eheien hos xa Hi di pisen ni mi xir mahulong pupu, nggoni ngan taxa labiteni labit,

*“Hi di misin ngan xil xa di lapet rat tase ni xil mun tang,  
e di pisen eheien hos nan mi ngan xil xa di lapol ni  
nenemien nae be tan.”* (Pro 3:34)✧

<sup>7</sup> Ma, ve rin ak, muling nenemien namim ihe tan tangan mupol ihusil nenemien na Hi. Musin nenemien na Temat. Xosxa mupol ni imak, ma xi ilesae reling xamim. ✧

<sup>8</sup> Reitin, mumei sangas visal Hi, e xi imei sangas visal xamim. Xamim xa mupolu ni tesaen, mumoten meulien

---

✧ 4:1: Rom 7:23; 1Pit 2:11    ✧ 4:4: Rom 8:7; 1Sion 2:15    ✧ 4:5: Eks 20:5  
✧ 4:6: Mat 23:12; 1Pit 5:5    ✧ 4:7: Efes 6:12; 1Pit 5:8-9

namim. Xamim xa nenemien namim be lu, musak ni tinemim mei imese tevi. ☆ <sup>9</sup> Mulonge isa ve tesaen namim xil, mutang e mumuis ven. Menen namim ve sexien tesa xil ihiles mei ihe tangen. Sien ve neta xa mikavui ihiles mei mulonge isa ven sung. <sup>10</sup> Xosxa muling nenemien namim ihe tan pe met Hi, ma xi ipet rat xamim muhe nesao. ☆

*Selxatien tangan Kristin xil linaseputut xat mosav xil ti e linasep koai ti*

<sup>11</sup> !Tuxoli e hinoxoli xil, munaseputut ni xamim ti! Xosxa museputut ni mosav tei, ma di mulepis rin nan. Mak, ma nggoni ngan taxa di museputut xat rae na Hi e di mulepisi mubit misa. E xosxa mulepis rae na Hi mubit misa, ma mupisen ni xa iemim ti tavei tangan muvusili e di muling xamim mube nesao muleli e mubit mupin tangan mulepisi. <sup>12</sup> E Hi kestang iaxa di misa rae xil, e xi kestang iaxa mikila ilepis neta xil. Di e xi kestang tangan iteh meulien e moletin xil, mu ihu lelen xil. ?Ma munemi mubit mupin tangan mulepis rin na tua namim xil? !E-e, mutapin ti! ☆

<sup>13</sup> Muteong ni nou, xamim xa mubiteni mubit, “Xosali mu visuvong, nihe taon. E rute ak, nita ihe haram tei e nipol ni polien xil. Mak, ma niso xat mani navan xil ihe holu.” ☆ <sup>14</sup> E munasep koai ti namak vengan xa mutakil ti naha xa istal visuvong. ?Meulien namim be naha? Meulien namim nggoni eas xa mistal e da vuteili tang, di, mikesae ba. <sup>15</sup> Bos mak mu tangan ti muviteni muvit, “Xosxa Hi Suv ien bei, ma xamem mumeul muti e mupol ni holesok xil ak.” ☆ <sup>16</sup> E taxeak, nenemien namim be nesao pupu e di musep koai holu. Sexien te sepkoaien

---

☆ 4:8: Sak 1:3; Mal 3:7; Aes 1:16    ☆ 4:10: Siob 5:11; 1Pit 5:6    ☆ 4:12: Rom 2:1; 14:4    ☆ 4:13: Pro 27:1; Luk 12:18-20    ☆ 4:15: Pol 18:21

misa. <sup>17</sup> Misak ni, xosxa mukil naha ngamu xa bos tangan mupol ni e mutapol ni ti, ma di mupol ni tesaen iaxai. ☆

## 5

*Selxatien mi ngan xil xa holesok nae holu xa di lapurun mosav xil*

<sup>1</sup> Muteong ni nou, xamim xa holesok namim xil holu. Bos mak mu xa ti mumuis e ti mutang ve longpangasien xil xa mahulong xa di bemei mi xamim. ☆ <sup>2</sup> Holesok xil xa muteso xati tehe holu di bo, e pipei xil di lakar tatal eising namim xil. ☆ <sup>3</sup> Mani namim xil xa di muso xati di be turara tuei. E turara ak iaxa ipisen kila xa mube hokan. E longpangasien teni mei ia len xamim ixoni upang vengan xa muteso xat holesok holu tehe namim, e taxeak radi e Melengien Kor xil. ☆ <sup>4</sup> Mutesis moletin xil mei latepol e urvatiei samim xil e latepol vuol ni polien nae xil ngamu. Di, mutekixat xat huit polien nae xil. !E taxeak, muteong ni keien te longpangasien nae! Keien na ngan xil xa latepol e urvatiei samim xil be nesao duxoh vurange Iahova, suv toto te ut nesao. ☆

<sup>5</sup> E ut etan ak, xamim mutepus hosien holu e mutehur holesok xil xa misak ni xamim di mulonge bos. E munggoni buluk xil xa lakaio kuhi xa laleh xil laba e melengien xati xa latelingi tangan lavas vin xil en. ☆ <sup>6</sup> Hi isa pangasien mi xamim vengan xa mutelihi ngan xil xa rin nae momal mei latehe von koten, e latnasak ti tangan lasikoe xol rin nae. Muteso sepinien teha xat xil, e mutemaen ni tangan ha lilel. Ve rin ak, rexil di xat hemim.

---

☆ 4:17: Luk 12:47    ☆ 5:1: Luk 6:24    ☆ 5:2: Mat 6:19    ☆ 5:3: Sam 21:9    ☆ 5:4: Lev 19:13; Dut 24:14-15; Mal 3:5; Sen 4:10; Sam 18:6; Aes 5:9  
 ☆ 5:5: Ser 12:3; 25:34

*Selxatien tangan Kristin xil lihisu ni melele xil te xeih itel nenemien xa ihe teviei*

<sup>7</sup> Be reitin, tuxoli e hinoxoli xil, xa Suv Iesu imei rilomun, ma mupol ni nenemien namim ihe teviei. Mei muxoni moletin tei te naho xa nenemien nan teviei. Vengan melele xa milih holesok san xil bus, di datili del nenemien xa teviei ba vuma ... us mus, eai ngga ni, di meul, e dutou ni, mikameti xa anien xil holu xa bos xa bos mei mistal nggo en. ☆ <sup>8</sup> Nggo sexien nen tak, nenemien namim ihe teviei. Ma, nenemien namim namot ti vengan xa meien na Suv di bemei sangas. ☆ <sup>9</sup> O tuxoli e hinoxoli xil, munaseputut ni xamim ti tangan munalih lesisien na Hi namei e xamim ven. ?Mutakil ti? Ngan xa di bemei tangan valepis rin na moletin xil dat sangas taxeak. ☆

<sup>10</sup> Xamim munem usil sexien hos na provet xil tetiamu xa latesepin mi moletin xil e his Hi Suv. Xil latehur longpangasien xil texo he mosav xil tetel nenemien xa tehe teviei. <sup>11</sup> E rapus sexien nae bos vengan xa di rabiteni xa tuxolxatien na Hi iti mi ngan xil xa di lasoh nggeih be nousav. Munem usil Siob xa tesoh texeih tehe nousav tetel longpangasien nan, e tetep iaxa Hi tesak ni hosien mei testal texo en. Reitin, Hi polu ni esaeen e eheien hos. ☆

<sup>12</sup> E tuxoli e hinoxoli xil, sexien teimun xa eilep mak mu tangan munapol ni ti iaxa, munasuv xat sepinien namim ti natel his neta te ut nesao mu te ut etan. Mak, ma melele xa mubit neta tei, muhiteri tang muhit, “Io,” ihe reitin tang. E melele xa mubit, “E-e,” ihe e-e tang. Vengan xosxa musuv xat sepinien namim ni neta tei, ma Hi ilepis sepinien namim ven. ☆

---

☆ 5:7: Dut 11:14; Ser 5:24; Soel 2:23    ☆ 5:8: Rom 13:11-12; Hib 10:25; 1Pit 4:7    ☆ 5:9: Mat 24:33    ☆ 5:11: Dan 12:12; Eks 34:6; Sam 103:8; 111:4  
 ☆ 5:12: Mat 5:34-37



*Sexien te sisen e meulien na Kristin xil*

<sup>13</sup> ?Midep? ?Rute e xamim di lalonge misa? Bos xa ti lisis. ?Rute e xamim di lalonge bos? Bos xa ti limes Hi itel kikeien xil. <sup>14</sup> ?Rute e xamim di lamesei? Bos xa lisis elda xil limei, e lisis ve xil e liteh oel xat xil e his Suv. ☆ <sup>15</sup> Lipol ni imak vengan xa sisen xa lasa ni del neketen ikila itutou ni ngan xil xa lamesei. Reitin, Hi ital rat xil ra mesien nae. E xosxa di lamesei ve tesaen nae xil, ma Hi naketeh ti mun nasa mi xil ven. ☆ <sup>16</sup> Mak, ma melele xa mupol ni tesaen, bos xa ha ti muhit rat tesaen namim mi teimun e xamim, e ti musis ve xamim tangan Hi ipol ni xamim mei muhos rilomun ra mesien namim xil. Vengan xa xeihen di e sisen na moletin xa meulien nan momal pe met Hi e ihur huite. <sup>17</sup> Xamim munem usil llaetsa xa tehe moletin tei texoni xir tang. E xi tesis texeih tangan us namus ti, ma us tenamus ti e tan te kantri ak tetuxoh huram tol (3) e aveti tei e he sav (6). ☆ <sup>18</sup> Di, melele xa tesis rilomun ve us, us temus texo tilang hat e tekas kuh tan na moletin xil te kantri ak e tesak ni holesok sae xil lateteh, latemeul, e lateso huite. ☆

<sup>19</sup> Tuxoli e hinoxoli xil, xosxa tei e xamim di mile ras suse te reitinen xa da en, ma musak pisi tangan mutel rilomun ni mei ihusili. ☆ <sup>20</sup> Munem kila xa ngan xil vus xa lakila laviles moletin tei xa di mika talang e tesaen nan xil di lateh nini moletin ak ra maten, e lasak ni Hi naketeh ti mun nasa mini ve tesaen nan xil.

---

☆ 5:14: Mak 6:13    ☆ 5:15: Mak 16:18    ☆ 5:17: 1King 17:1; Luk 4:25

☆ 5:18: 1King 18:42-45    ☆ 5:19: Pro 10:12; 1Pit 4:8

Vanuvei Eo e sepinien Vatlongos na mol-Vatimol xil  
niutestamen e rute te oltestamen  
Portions of the Holy Bible in the Southeast Ambrym Language of  
Vanuatu  
Des portions de la Sainte Bible dans le Sud-Est Ambrym Langue de  
Vanuatu

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

---

PDF generated using Haiola and XeLaTeX on 11 Mar 2022 from source files dated 11 Mar 2022

d6322831-f65b-57c1-8673-8099ea7771d7